

Ini Sa Igsulat Denu Si HONAS

Ini Denu Sa Libelu Honas

Na, tinulon diyà siini libelu sa medoo egkebaelan i Honas sa tegesugkow kagi i Nemula egoh di migsalibang diyà sa igsugù i Nemula kenagdi. Sinugù i Nemula Honas i eg-angay dutu menuwa Niniba dò sa dakel menuwa diyà sa uwang tanà Asiliya kenà sa medoo egkuntelà sa medoo tegeIslaél. Dodoo eg-eked Honas i eg-angay dutu, enù ka iya sa penemdem di endà petuuwen i Nemula duu sa kepigtamay di sa medoo etaw dahiya. Agulé egoh di nelugaylugay, migpangunut doo Honas i diyà sa igsugù i Nemula, dodoo mebegat sa pedu di egoh di mighaa endà neketuu sa kepigtamay i Nemula kenagda.

Na, danà siini surat netiigan ta sa kesabà i Nemula sa langun taman. Owoy netiigan ta dakel sa kehidu i Nemula etaw owoy ungayà di ipeuloy di sa salà sa etaw, apiya di pa sa salà binaelan sa egkuntelà sa etaw di. Amuk mesenulè sa etaw owoy amuk ekekan da sa salà binaelan da, endà petuuwen i Nemula duu sa kepigtamay di kenagda.

Ini Sa Egoh I Honas Endà Migpangunut Diyà Sa Igsugù I Nemula

1 ¹Na, sebaen agdaw mig-ikagi Datù Nemula i diyà si Honas anak i Amitayi. ²Guwaen di, “Ipanaw ka angay dutu siedò dakel menuwa Niniba, owoy petaled ko sa keikagi ko eg-indaw sa medoo etaw dutu enù ka netiigan ku tigtu medaet sa langun egbaelan da.” ³Dodoo ungayà i Honas pelaguyan di hedem Datù Nemula i, huenan di migsalibang polo eg-angay diyà sa menuwa Hopi kenà di mighaa sa kumpit mangay Espaniya dò. Agulé migsukay Honas i eg-edà anì peunut kenagda mangay Espaniya dò enù ka egpelaguyan di hedem Datù Nemula i.

⁴Dodoo egoh sa kumpit eg-ipanaw dé diyà dagat, pineduen i Datù Nemula sa tigtu meleges kelamag diyà sa dagat kenà da. Huenan di, buyu egkedaetan sa kumpit inedaan di. ⁵Hê, tigtu egkelimedangan sa medoo eggalebek diyà sa kumpit, owoy uman sebaen diyà kenagda egpegeni da

tabang diyà sa munoy nemula da. Agulé eggenabuen da diyà dagat sa medoo iglulan da anì lumagpuk sa kumpit. Dodoo si Honas, mig-angay polo egtudug diyà sa sebaen luwang kumpit denu leketanà.

⁶Agulé hinaa sa kapitan kumpit Honas i owoy inikagiyan di, guwaen di, “Maen ko i egtudug? Enaw ka owoy pegeni ka tabang diyà sa nemula ko. Petow ki daa kumehidu, owoy alukan di kita.”

⁷Agulé neseolom sa medoo tegegalebek diyà kumpit, guwaen da, “Sebunutay ki anì metiigan ta ngadan tayu di etaw sa pesuwan siini kelikutan eghauwen ta.” Hê, egoh da migsebunutay, iya sa nehauwan da sa ngadan i Honas. ⁸Huenan di, mig-ikagi da diyà kenagdi, guwaen da, “Kuna mabes sa pesuwan ini i kelikutan ta. Ngadan sa egbaelan ko dahini? Ngadan di menuwa keduwan ko i? Ngadan ko i balangan etaw kuna i?”

⁹Migsagbi Honas i, guwaen di, “Etaw Hibelu a, owoy sa Nemula egsimbaan ku sa Nemula diyà langit sa migbael dagat owoy tanà.” ¹⁰Agulé tinulonon di ma kagda sa egoh di egpelaguy hedem diyà si Datù Nemula.

Huenan di, tigtu egkelimedangan sa medoo tegegalebek diyà kumpit, owoy mig-ikagi da diyà si Honas, guwaen da, “Mekepesu iya wé binaelan ko.” ¹¹Ligò di egkeumanan ma egkeleges sa kelamag, huenan di inigsaan sa medoo tegegalebek diyà kumpit Honas i, guwaen da, “Ngadan sa kebael ké keniko anì luminek siini dagat?”

¹²Migsagbi Honas i, guwaen di, “Nabù yu aken diyà dagat anì sumabuh sa meleges kelamag owoy luminek ma sa dagat. Enù ka netiigan ku aken sa pesuwan di tinebow ki siini meleges kelamag.”

¹³Dodoo eg-udes da eggula sa medoo tegegalebek diyà kumpit anì mekepelikù da hedem diyà sa mantadan. Dodoo endà egpekegaga da enù ka egkeumanan polo sa keleges sa kelamag. ¹⁴Huenan di, egpegeni da tabang diyà si Datù Nemula, guwaen da, “O Datù Nemula, egpegeni ké anì endà pigtamayan ko duu kami danà ké mimatay siini etaw owoy anì endà ma imatayan ko duu kami danà ini i baelan ké. Enù ka netiigan ké, o Datù Nemula, kuna doo sa pesuwan di nehaa ké ini i enù ka danà sa ungayà ko doo.” ¹⁵Agulé hinenat da Honas i owoy ninabù da diyà dagat. Hê, petow dé migsabuh sa kelamag owoy miglinek ma dé sa dagat. ¹⁶Agulé tigtu nelimedangan sa medoo tegegalebek diyà kumpit diyà si Datù Nemula. Huenan di, mig-imatay da sa hinagtay ibegay da uloy diyà si Nemula, owoy migpasad da ma sa egoh da mangunut diyà kenagdi.

¹⁷Agulé igpeamah i Datù Nemula Honas i diyà sa dakel sedà. Hê, telu agdaw owoy telu gesigep sa lugay i Honas dalem getek sa sedà.

Ini Sa Egoh I Honas Migsimbà

2 ¹Na, egoh i Honas dalem dé getek sa sedà, migsimbà diyà si Datù Nemula, sa Nemula egpigtuuwen di. ²Guwaen di, “O Datù Nemula,

mig-umow a diyà keniko danà siini kelikutan ku, owoy sinagbian ko aken. Egoh ku diyà bayà, migpegeni a tabang owoy dinineg ko aken. ³Igbuung ko aken diyà sa pused dagat taman nekeuma a diyà sa getan dagat. Inuwit a sa leges dagat danà di egpekedelegpà diyà kenak sa dakel lambeg pineangay ko. ⁴Iya sa penemdem ku nehemagawan a dé kedu diyà keniko owoy endà dé hauwen ku duu uman sa mapulù dalesan ko. ⁵Sinelut a sa wayeg owoy egkepagkus a ma. Nelimunan a sa dagat owoy nebedbed ma keluwen dagat sa ulu ku. ⁶Nekeangay a diyà sa pesu tuduk diyà sa pused dagat, kenà sa bengawan endà meukaan di taman melugay sa kenà ku endà mekelaun. Dodoo, o Datù Nemula sa Nemula egpigtuuwen ku, inuwit ko doo aken nehagtay kedu diyà sa pused dagat. ⁷Egoh ku egtugedam buyu egkebugtus sa ginawa ku, migsimbà a diyà keniko, o Datù Nemula, owoy dinineg ko doo aken kedu diyà sa mapulù dalesan ko. ⁸Na, sa medoo etaw egpenemula sa inetaw endà duen ulan, ininiyugan da polo kuna sa tigtu mehidu. ⁹Dodoo aken, umolò a keniko owoy megay a ma diyà keniko sa hinagtay ulowen ku amuk sumimbà a owoy ipetuu ku ma sa igpasad ku. Enù ka kedu diyà keniko, o Datù Nemula, sa kealuk etaw.”

¹⁰Agulé sinugù i Datù Nemula sa sedà anì suwahren di Honas i diyà sa mantadan. Hê, migpangunut sa sedà.

Ini Sa Egoh I Honas Migpangunut Diyà Sa Igsugù I Nemula

3 ¹Na, mig-ikagi dema Datù Nemula i diyà si Honas. ²Guwaen di, “Ipanaw ka angay dutu siedò dakel menuwa Niniba, owoy tulon ko diyà sa medoo etaw di sa inikagi ku diyà keniko.” ³Agulé migpangunut Honas i diyà si Datù Nemula, huenan di mig-angay Niniba dò. Na, tigtu melabel sa menuwa Niniba, huenan di amuk umedung sa etaw diyà sa sebaen kilidan di mangay diyà sa sebaen ma kilidan di, telu agdaw eg-ipanawen asal egpanteken. ⁴Agulé mig-awuh Honas i diyà sa menuwa Niniba. Hê, egoh di segdu dé eg-ipanaw dalem sa menuwa, migpetaled eg-ikagi, guwaen di, “Medaetan sa menuwa Niniba amuk meuma epat pulù agdaw edung ini egoh di.”

⁵Na, egoh sa medoo tegeNiniba migdineg sa kagi i Nemula tinulon i Honas, migpigtuu da. Huenan di, migsasà da diyà sa kedoowon da anì peulanen da langun sa kekaen da, owoy migkawal ma sa langun etaw sa binekas sakù, edung diyà sa kawasà taman sa pubeli, anì metandaan sa egoh da nesenuê.

⁶Na, egoh sa datù tegeNiniba migdineg denu iya wé, miglegkang kedu diyà sa metolol bangkù di. Hê, linuwas di sa metolol kawal di, owoy migkawal polo sa binekas sakù owoy mig-angay eg-ugsad diyà sa megenaw dé abuh. ⁷Owoy migpeuwit ma kagi anì ipetiig di diyà sa medoo duma di tegeNiniba, guwaen di, “Aken i datù yu owoy sa medoo

salu ku, egsuguen ké kiyu anì peulanen ta langun sa kekaen ta owoy sa keinem ta, lapeg sa medoo hinagtay ta ma. ⁸Owoy sa langun etaw, kumawal ki sa binekas sakù owoy lagbungì yu sakù sa iyug sa medoo hinagtay. Owoy tumemù ki sumimbà diyà si Nemula owoy ekedan ta ma sa medaet adat ta owoy sa medaet egbaelan ta. ⁹Enù ka mepelumanan kéen sa penemdem i Nemula owoy endà bulitan di duu kita kéen. Amuk hediya, endà mepigtamayan di duu kita.”

¹⁰Na, hinaa i Nemula sa binaelan da egoh da mig-iniyug sa medaet adat da. Huenan di, nepelumanan sa penemdem di owoy endà igpetuu di duu sa mekelimedang kepigtamay di kenagda, apiya di pa iya sa igpetulon di diyà si Honas.

Ini Sa Egoh I Honas Migbulit Dodoo Nehiduwan

I Nemula Sa Medoo TegeNiniba

4 ¹Na, danà di nepelumanan sa penemdem i Nemula, huenan di tigtu endà neiyap Honas i owoy migbulit ma. ²Agulé migsimbà, guwaen di, “O Datù Nemula, egoh ku endà pa mig-angay dini, beken tapay dé atu inikagi ku sa baelan ko éhê ini i? Iya sa pesuwan ku migpelaguy a eg-angay Espaniya dò. Enù ka netiigan ku kuna sa Nemula tigtu mehidu owoy metaes tali ka ma owoy mepelumanan ma sa penemdem ko anì endà ipetuu ko duu sa kepigtamay ko etaw. ³Huenan di, imatayi ko aken, o Datù Nemula, enù ka uman pa mepion amuk mematay a dé diyà sa egoh ku nehagtay a pelawà.”

⁴Agulé migsagbì Datù Nemula i, guwaen di, “Maen di ya igbulit ko ini i?”

⁵Agulé miglegkang Honas i mig-angay denu tebowon agdaw amuk diyà ki sa menuwa Niniba. Hê, migbael lawì kenà di humelung owoy mig-ugsad dahiya enù ka eg-angat-angatan di humahaa sa mebaelan sa menuwa Niniba. ⁶Agulé migpetunas Datù Nemula i sa hinemula anì mealungan Honas i anì kumepion sa nanam di. Hê, tigtu neangangan i Honas iya wé hinemula. ⁷Dodoo egoh di sumimag dé, sinugù i Nemula sa limegu anì ipekettek di iya wé hinemula. Hê, miglegupay. ⁸Agulé egoh di buyu dé mekebugsang, pinetebow i Nemula sa meedup kelamag kedu tebowon agdaw. Hê, migkelenek Honas i danà di nebekol sa meedup agdaw. Huenan di, iya sa ungayà di mematay dé hedem, owoy guwaen di, “Mepion pa amuk mematay a dé diyà sa egoh ku nehagtay a pelawà.”

⁹Dodoo mig-ikagi Nemula i diyà si Honas, guwaen di, “Maen di ya igbulit ko sa nebaelan sa hinemula?”

Migsagbì Honas i, guwaen di, “Hoò, enget doo sa pesuwan ku egbulit. Tigtu a egbulit, huenan di ungayà ku mematay a.”

¹⁰Agulé mig-ikagi dema Datù Nemula i, guwaen di, “Migtunas siini hinemula segesigep daa owoy egoh di sumimag mekedan mendaa. Endà

duen sa liteg ko dahiya owoy beken ma kuna sa migpetunas. Maen di ya nelemetan ko iya wé? ¹¹Labi pa aken i duu, tigtu eghiduan ku sa dakel menuwa Niniba danà di duen sepulù owoy duwa lagsà geetaw dahiya endà pa mipedu da, liyu pa sa medoo hinagtay.”